

Fu leto una letera di sier Justinian Morexini podestà di Bergamo, per uno caso seguido. Fo amazà uno prete di conti di Calepio a casa sua, stando al fuogo, da do incogniti, et non si sapendo chi sia, siali dà autorità poter dar taia a chi acuserà lire 500, *ut in parte*. Fo presa: 135, 7.

Fu posto, per sier Stefano Contarini, sier Alvise di Prioli provedadori a l'Arsenal, zerta parte in confirmatin di parte prese 1503, 26 Zener, et 1508, 8 April. *Item*, sia tenutò a li Camerlengi una cassa separada de li danari aspetanti a l'Arsenal, con certe clausule *ut in ea*. Qual parte havia molti capi et li Savii non la sentiva, et non fo lassata mandar, et li Cai di X volse rispeto per esser cosa pertinente in parte al suo Consejo; sichè non fo balotata.

Fu posto, per li Savii, elezer cinque Savii sora la merchadantia di quelli di Pregadi e di la zonta, stagiò fin San Michiel, et il Sabato vegni in Colegio con le opinion loro *ut in parte*; habino cura di veder le spexe superflue di ofici *ut in parte*. La qual non fo mandata, e li Avogadori extraordinari andono dai Savii a dir queste spexe è stà commesso a a loro per la so' creation.

103* Fu posto, per sier Hironimo Grimani el consier, una parte molto longa, *videlicet*, in execution di le leze sia tajà e anulà tutte le balotation fate per el Colegio et salari dati ad alcun senza autorità di questo Consejo. *Item*, atento molte concession fate per li Capitani zenerali e altri, confirmate per la Signoria, siano nulle non hessendo aprovate per questo Consejo; et cussì di Provedadori e Rectori de le terre nostre; con altre clausule *ut in parte*. E fato lezer le parte che parla di questo, sier Andrea Baxadona el consier vol la parte, con questo sia osservata *de cætero*. Andò le parte. Fo 5 non sincere, 82 dil Baxadona, 83 dil Grimani. Non fo preso; bisognava rebalotar, nè fo publicate le balote, perchè li Cai di X suspenseno la dita parte, perchè col Consejo di X era stà posto certe confirmation, et fate a balotation in Colegio intervenendo i Cai di X, che per questa parte andava zoso.

Et nota. Dita parte, fu posta perchè sier Piero Venier, è sopra le fabriche di Padoa, eleto per Colegio con salario, el qual fo quello messe la parte contra sier Antonio Grimani padre dil prefato sier Hironimo consier quando el fo condanà; hora vol non sia più. *Item*, è sier Antonio Barbaro di sier Francesco, qual per Colegio è stà electo provedador in Are. *Item* Hironimo Amadi electo scrivano a le Cazude.

Fu posto, per li Consieri, una parte di zudei

quali imprestano con dar lire 6 per ducato, et el sia mal fato. Sia preso che li diti debano in termene de zorni . . . aver portà a li Camerlengi quanto hanno tolto di ditta raxon, da esser poi dati a chi li dia aver, soto pena de pagar altrantanto qual sia; e sia comessa a li Avogadori extraordinarii. Et perchè sier Giacomo da Canal, *olim* podestà di Mestre, fe' certo precesso contra diti zudei qual fo portato a l'Avogaria, che li Avogadori presenti e quelli intromesseno insieme col Podestà di Mestre presente, debano in termene de do mexi aver expedito, *aliter* sia comesso a li diti Avogadori extraordinari. Ave' 9 de no, 138 de si. *Item*, li Sopraconsoli da anni 15 in qua apresenti il sorabondante hanno in le mano, soto pena, *ut in parte*.

Die VIII Novembris 1516, in Rogatis. 104

Exemplum.

Sier Hironimus Grimani, *consiliarius*

Fu statuido, per deliberation de questo Consejo del 1427, a dì 23 del mese de Marzo, che occurendo bisogno de mandar fuora per i servitii publici alcun nobele, over popular, per el Colegio nostro, el non se potesse far salvo per scurtinio et balotation di esso Colegio. *Successive autem*, havendo il Colegio predito adduto in consuetudine di elezer Provedadori, Castellani, Massari et altri, che rendevano utilità, fu statuido di 14 de April 1462, che tal electione non se potessero far per alcun modo per il Colegio nostro, ma per questo Consejo: le qual provision furono *supra modum* necessarie. *Tamen*, sono stà da certo tempo in qua poco exequide, con non vulgar danno de la Signoria nostra et universal murmuratione, perchè molti zentilhomeni sono stà per esso Colegio nostro, mandati *signanter* in servitii publici, ne è sta fata alcuna electione per via de scurtinii, come era justo et conveniente. Sono stà *etiam* mandati per la istessa forma molti popolari, *cum* salari et utilità da' deti senza deliberation dei Consigli nostri; la qual cosa è *penitus aliena* da la intention et firmo proposito dei mazori nostri, come se vede manifestamente per le leze preallegate. Però, aziò simil desordeni non procedino più oltra,

L'anderà parte, che tutte le electione fatte per el Colegio nostro, non servada la forma de le leze preditte, si de nobeli come de popolari, siano irritate, nulle, casse, et revocate: nè *de cætero* possa